


REGULAMENTO DE CONSTITUCIÓN DE DEPARTAMENTOS



UNIVERSIDADE
DE VIGO

ÍNDICE

CAPÍTULO I. TÍTULO PRELIMINAR

Artigo 1	1
----------------	---

CAPÍTULO II. DA CREAÇÃO, MODIFICAÇÃO E SUPRESIÓN

Artigos 2	3
-----------------	---

Artigos, 3, 4	4
---------------------	---

Artigo 5	5
----------------	---

Artigo 6	6
----------------	---

Artigos, 7, 8	7
---------------------	---

CAPÍTULO III. DO GOBERNO DOS DEPARTAMENTOS

Artigos, 9, 10, 11	11
--------------------------	----

Artigos, 12, 13, 14	13
---------------------------	----

Artigo 15	15
-----------------	----

Artigo 16	16
-----------------	----

CAPÍTULO IV. DOS ÓRGANOS DE GOBERNO UNIPERSONAIS

Artigos, 17, 18	17
-----------------------	----

Artigo 19	18
-----------------	----

Artigo 20	19
-----------------	----

Artigos, 21, 22	20
-----------------------	----

DISPOSICIÓN TRANSITORIAS

Primeira, Segunda	23
-------------------------	----

Terceira	24
----------------	----

DISPOSICIÓN FINAL

25

CAPÍTULO I

TÍTULO PRELIMINAR

Artigo 1

1. Os departamentos son órganos básicos encargados da organización e desenvolvemento da ensinanza, de acordo cos planos de estudo, e da investigación nos distintos centros da Universidade de Vigo. Deben constituírse, preferentemente, por cada área de coñecemento e, no caso de non ser posible, constituiranse por áreas de coñecemento científico, técnico ou artístico, adscritas a un mesmo ámbito científico dos definidos na Disposición Adicional Primeira dos Estatutos da Universidade de Vigo.

2. De conformidade co artigo 14 dos Estatutos da Universidade de Vigo, o presente regulamento regulará a creación, modificación e supresión de departamentos.

CAPÍTULO II

DA CREACIÓN, MODIFICACIÓN E SUPRESIÓN

Artigo 2

1. A creación dos departamentos é competencia do Claustro Universitario, de acordo co Art. 14 dos Estatutos da Universidade de Vigo. Coa proposta de creación de departamentos debe achegarse dunha memoria que faga referencia, polo menos, ós seguintes aspectos:

- a) Denominación e ámbito científico ó que se adscribe.
- b) Area ou áreas de coñecemento de que consta.
- c) Líñas e proxectos de investigación.
- d) Medios personais docentes e investigadores.
- e) Medios materiais docentes, en particular número, tipo e capacidade de laboratorios.
- f) Medios materiais investigadores.
- g) Medios financeiros, se os houbera.

2. As propostas de creación elaboradas polas áreas de coñecemento ou por grupos de profesores que as integran, serán

presentadas ó Vicerrectorado de Ordenación Universitaria. Nos pedimentos efectuados por unha área de coñecemento, deberanse facer consta-las propostas alternativas ou votos particulares presentadas, se as houbera, por parte de grupos de profesores da área de coñecemento. A Xunta de Goberno, en función das documentacións presentadas e oída a Comisión de Ordenación Académica e Validacións, elevará ó Claustro unha proposta, para o seu debate e aprobación, da estrutura departamental da Universidade de Vigo, a cal terá tódolos efectos a partir do día seguinte da súa aprobación.

Artigo 3

Para a constitución dun departamento será necesario dispoñer dun número de catedráticos ou profesores titulares non inferior a 12 con dedicación a tempo completo. Para efectos do cómputo do número anterior, dúas dedicacións a tempo parcial consideraranse equivalentes a unha a tempo completo. En calquera caso, todo departamento deberá contar, alomenos, con 5 catedráticos ou profesores titulares con dedicación a tempo completo.

Artigo 4

1. Os departamentos serán únicos por área ou áreas de coñecemento. Non obstante, cando unha área de coñecemento agrupe a un número de catedráticos ou profesores titulares superior a 24, o Claustro Universitario, oído o departamento e tralo informe favorable da Xunta de Goberno, poderá autorizar excepcionalmente a creación de dous, ou de se-lo caso, de sucesivos departamentos, tendendo preferentemente a criterios

de tipo xeográfico, de coherencia científica ou de coherencia investigadora, de acordo cos artigos 2 e 3 do presente Regulamento e sen perxuízo do disposto no artigo 4.4. do R.D. 2360/1984 do 12 de decembro.

2. Coa proposta de creación de departamentos, aludidos no apartado anterior, deberá achegarse unha memoria que faga referencia, polo menos, ós seguintes aspectos:

- a) Denominación e área de coñecemento.
- b) Razóns do pedimento de creación do novo departamento.
- c) Líñas e proxectos de investigación.
- d) Medios persoais docentes e investigadores.
- e) Medios materiais docentes, en particular número, tipo e capacidade de laboratorios.
- f) Medios materiais investigadores.
- g) Medios financeiros, se os houbera.

Artigo 5

1. Excepcionalmente, cando concorran circunstancias de tipo xeográfico, de coherencia científica ou investigadora, a Xunta de Goberno, logo do informe do departamento, poderá autoriza-la creación de seccións departamentais.

2. Para a creación dunha sección departamental serán necesas-

rios, como mínimo, seis profesores con dedicación a tempo completo dos cales, polo menos, tres serán catedráticos ou profesores titulares. A efectos de cómputo de dito mínimo, dúas dedicacións a tempo parcial consideranse equivalentes a unha a tempo completo.

3. Cada sección departamental estará dirixida por un catedrático ou profesor titular desa sección. As súas competencias estarán fixadas no Regulamento de Réxime Interno do departamento.

4. Coa proposta de creación de sección departamental achegárase unha memoria que faga referencia, polo menos, ós seguintes aspectos:

- a) Área ou áreas de coñecemento de que consta.
- b) Razóns do pedimento de creación de sección departamental.
- c) Líñas e proxectos de investigación
- d) Medios persoais docentes e investigadores.
- e) Medios materiais docentes, en particular número, tipo e capacidade de laboratorios.
- f) Medios materiais investigadores.

Artigo 6

1. Por pedimento dun departamento, a Xunta de Goberno pode-

rá autoriza- la adscripción temporal a este de ata dous profesores ou axudantes pertencentes a outro ou outros departamentos, tralo o informe favorable destes últimos. A duración destas adscripcións será por un curso académico, e poderá ser prorrogada por un curso máis, no caso de que medien novos informes favorables.

2. En ningún caso poderán contabilizarse os profesores adscritos doutro departamento a efectos de obte-lo número mínimo esixido nos artigos 3, 4 e 5 do presente Regulamento.

Artigo 7

Sen prexuízo do mínimo esixido no artigo 19.1 dos Estatutos e ós efectos de obte-lo máximo rendemento dos recursos docentes e investigadores, poderán constituírse departamentos interuniversitarios mediante convenios da Universidade de Vigo e outras universidades. Nestes casos, o Regulamento de Réxime Interno do departamento deberá figurar no convenio, que debe ser aprobado polo Claustro da Universidade de Vigo.

Artigo 8

A modificación e supresión dos departamentos é competencia do Claustro Universitario, de acordo co Art. 14 dos Estatutos da Universidade de Vigo.

1. Coa proposta de modificación achegarse dunha memoria que faga referencia, polo menos, ós seguintes aspectos:

a) Nova denominación e área ou áreas de coñecemento de que consta.

- b) Razóns do pedimento de modificación do departamento.
- c) Líñas e proxectos de investigación.
- d) Medios persoais docentes e investigadores.
- e) Medios materiais docentes, en particular número, tipo e capacidade de laboratorios.
- f) Medios materias investigadores.
- g) Medios financeiros, se os houbese.

2. Cando o número mínimo de profesores aludido no artigo 3, para a constitución dun departamento, se vexa reducido por baixas no servizo ou variacións na cadro de persoal durante un período de 3 anos, ou cando, en calquera momento, este mínimo sexa inferior a 9, ou se incumpra o mínimo de 5 catedráticos ou profesores titulares con dedicación a tempo completo, sinalado no mesmo artigo, as áreas afectadas deberán reorganizarse noutros departamentos.

3. A Xunta de Goberno propondrá ó Claustro Universitario a integración de ditas áreas en departamentos constituídos cos que manteña afinidade dentro do seu mesmo ámbito científico, para o que será preceptivo un informe dos departamentos receptores.

4. Na proposta de supresión ou modificación debe especificarse a situación futura do seu persoal, dos medios materiais adscritos e, de se-lo caso, das obrigacións docentes.

5. As propostas de modificación elaboradas polas áreas de coñecemento ou polos grupos de profesores que as integran,

presentaranse ó Vicerrectorado de Ordenación Univer-sitaria. Nos pedimentos efectuados deberanse facer constar as propostas alternativas ou votos particulares presentadas, se as houbese, polos grupos de profesores das áreas de coñecemento. A Xunta de Goberno, en función da documentación presentada e oída a Comisión de Ordenación Académica e Validacións, elevará ó Claustro unha proposta, para o seu debate e aprobación, da estrutura departamental da Universidade de Vigo, a cal terá tódolos efectos a partir do día seguinte ó da súa aprobación.

CAPÍTULO III

DO GOBERNO DOS DEPARTAMENTOS

Artigo 9

O réxime de goberno dos departamentos da Universidade de Vigo fundaméntase no principio de representación de todos os sectores da comunidade universitaria nos seus Consellos, así como no de designación por elección da persona que vaia ocupa-lo cargo de director de departamento.

Artigo 10

Os departamentos disporán dunha sede. A sede do departamento estará localizada onde designe ó Consello do departamento. Por un período mínimo de 3 anos non poderá modificarse a sede do departamento. Naqueles casos nos que o departamento teña instalacións propias a sede estará situada nelas.

Artigo 11

Son funcións dos departamentos as seguintes:

- a) Organizar, programar e desenvolver, nos distintos ciclos dos estudos universitarios, as ensinanzas propias da área ou áreas de coñecemento da súa competencia, de acordo coa programación xeral que realice o centro ou centros nos que se dispensen estas.

b) Realiza-la actividade investigadora na área ou áreas de coñecemento da súa competencia.

c) Organiza-los estudos de doutoramento, de acordo co establecido no artigo 31 da L.R.U., no R.D. 2360/1984 e nos Estatutos da Universidade de Vigo.

d) Realizar traballos de carácter científico, técnico ou artístico, así como desenvolver cursos de especialización, reciclaxe, extensión universitaria e actualización científica, conforme ó disposto nos artigos 11 e 45 da L.R.U. e nos Estatutos da Universidade de Vigo.

e) Impulsa-la formación e a renovación pedagóxica, científica, técnica ou artística do persoal docente e investigador da Universidade.

f) Xestionar e administra-la súa asignación presupostaria.

g) Elaborar e publicar, de acordo co apartado 2 do artigo 204 dos Estatutos da Universidade de Vigo, os programas das ensinanzas adscritas a cada área ou áreas de coñecemento de acordo cos contidos e directrices dos planos de estudio.

h) Programar e asigna-los seus medios e recursos, así como coidar do mantemento e renovación dos seus bens, equipos e instalacións.

i) Todas aquelas que lle poidan atribuí-los Estatutos da Universidade de Vigo e outras disposicións vixentes.

Artigo 12

1. Os departamentos elaborarán unha memoria anual das actividades docentes, investigadoras e de calquera outro tipo realizadas. Esta memoria farase pública ó comenzo de cada curso académico.
2. Os departamentos elaborarán programas plurianuais de investigación e de formación do profesorado, nos que se recollerán as liñas de actuación, os proxectos específicos e recursos de persoal e material necesarios, tendo en conta a tal fin os condicionamentos territorias.

Artigo 13

Para cumprimento dos seus fins, os departamentos contarán cun presuposto constituído por:

- a) Partida presupostaria ordinaria.
- b) Partida presupostaria investigadora.
- c) Ingresos obtidos a través dos contratos ós que alude o artigo 11 da Lei de Reforma Universitaria.

Artigo 14

O Consello de Departamento é o órgano colexiado de representación e decisión do departamento. Estará integrado por:

- a) Tódolos profesores e axudantes do departamento.

b) Tódolos bolseiros de formación de persoal investigador ou equivalentes.

c) Unha representación dos estudantes que constituirá o 24% do total dos membros do Consello de Departamento, da que o 10% será de estudantes de 1º e 2º ciclo e o 14% de 3º ciclo. No caso de que o número de estudantes de 3º ciclo non permita cubri-la súa porcentaxe, a diferenza acumularase na porcentaxe de 1º e 2º ciclo. En todo caso, garantirase unha representación de, polo menos, un alumno de cada un dos centros onde dispensa docencia o departamento, no caso de se presentar.

Os profesores, axudantes e bolseiros que sexan estudantes de terceiro ciclo non poderán contabilizar nesta representación

d) Unha representación do persoal de administración e servizos, adscritos ó departamento, que constituirá o 9% do total dos membros do Consello de Departamento. O persoal de administración e servizos adscrito a dous ou máis departamentos, nos que comparta a prestación dos seus servizos, poderá ser candidato no que teña maior dedicación horaria, tendo que optar por un deles nos casos de igual dedicación.

e) Unha representación dos bolseiros, non incluídos en ningún dos apartados anteriores, igual ó 2% da composición total do Consello de Departamento.

Os membros electos do Consello de Departamento serán renovados cada ano.

Artigo 15

Son competencias do Consello de Departamento:

- a) Elaborar, aprobar e modifica-la proposta de Regulamento de Réxime Interno do Departamento.
- b) Elixir-lo director do departamento e revogalo, mediante moción de censura que debe alcanzar maioría absoluta.
- c) Elixir, cando cumpra, os representantes do departamento en todos aqueles órganos nos que estea, representado.
- d) Aprobar, de se-lo caso, a proposta de seccións departamentais.
- e) Elaborar e aproba-lo plano anual de actividades docentes e investigadoras.
- f) Formula- lo pedimento á Universidade de Vigo do persoal docente e investigador, nos termos do artigo 39 de la L.R.U., así como os recursos económicos e materiais necesarios para a execución do plano de actividades docentes e investigadoras.
- g) Elaborar e aproba-la memoria anual do departamento.
- h) Aproba- la distribución do presuposto anual do departamento e súa execución.
- i) Revisa-la avaliación dos estudantes, cando corresponda

j) Participar nos procedementos de selección do persoal académico.

k) Todas aquelas que non estean atribuídas de forma expresa ó director do departamento.

O Consello de Departamento reunirase con carácter ordinario, polo menos, unha vez ó trimestre, ou con carácter extraordinario por iniciativa do director ou por pedimento dun tercio dos seus membros.

Artigo 16

O Consello de Departamento elaborará o regulamento de réxime interno nun prazo de seis meses a partir da data da súa constitución, e remitirao á Xunta de Goberno que o someterá ó Claustro para a súa aprobación.

CAPÍTULO IV

DOS ÓRGANOS DE GOBERNO UNIPERSONAIS

Artigo 17

Son órganos, de goberno do departamento, unipersonais, o director, o secretario ou se é o caso o subdirector. Todos eles estarán acollidos ó réxime de dedicación a tempo completo na Universidade de Vigo. Os departamentos formados por varias áreas de coñecemento ou que dispensen docencia en máis dun centro, poderán utiliza-las figuras de coordinadores, as cales serán reguladas no Regulamento de Réxime Interno do departamento.

Artigo 18

O director de departamento será elixido polo Consello de Departamento segundo o proceso seguinte:

a) En primeiro lugar procederase a vota-los candidatos que sexan catedráticos de universidade. Será elixido o candidato que obteña máis votos afirmativos e que acade a maioría absoluta dos presentes.

No caso en que máis de un candidato obtivera máis votos afirmativos ca negativos e que ningún deles alcanzara a

maioría absoluta, procederase a unha nova votación entre os dous candidatos máis votados, sendo elixido o candidato que obteña maior número de votos. Se neste último procedemento non se alcanzase a maioría absoluta, deberán convocarse eleccións nun prazo máximo de 3 meses.

b) De non haber ningún candidato que obteña máis votos afirmativos ca negativos, efectuarase outra votación na que entrarán tamén os demais candidatos profesores numerarios doctores. O procedemento de elección será o mesmo do apartado a).

c) No caso de non obter ningún deles máis votos afirmativos ca negativos procederase a última elección, na que poderán presentase como candidatos profesores numerarios non doutores. O procedemento de elección será o mesmo do apartado a).

En todo caso, o candidato elixido deberá estar acollido ó réxime de dedicación a tempo completo. Se nun departamento non se puidese realiza-la elección, o Rector nomeará, en funcións e segundo a xerarquía de categoría, antigüidade e idade, ó profesor que non incorra en incompatibilidade.

Artigo 19

Son funcións do director de departamento:

a) Presidir los órganos colexiados do departamento, que convocará para as súas reunións ordinarias e extraordinarias de acordo co establecido no seu Regulamento.

- b) Exerce-la representación do departamento.
- c) Executa-los acordos do Consello de Departamento e velar polo seu cumprimento.
- d) Dirixir e coordina-la actividade do departamento e todas as ordes da súa competencia.
- e) Executa-las previsións presupostarias.
- f) Negociar con entidades públicas ou privadas e de acordo co Consello de Departamento, os traballos e cursos ós que se refire o artigo 11 da Lei de Reforma Universitaria, sempre que iso afecte ó departamento como tal.
- g) Calquera outra que lle encomende ou delegue o Consello de Departamento ou que se estableza no Regulamento de Réxime Interno.

Artigo 20

Soamente os departamentos formados por unha única área de coñecemento e cun número de catedráticos ou profesores titulares, con dedicación a tempo completo ou equivalente, superior a 24 poderán dispor de subdirector de departamento.

Son funciones do subdirector de departamento:

- a) Presidi-los órganos colexiados e exerce-la representación do departamento en ausencia do director.
- b) Dirixir e coordina-las actividades da área de competencia

do departamento que se lle asigne, baixo a autoridade do director.

c) Calquera outra que lle encomende ou delegue o director de departamento ou que se estableza no Regulamento de Réxime Interno.

Artigo 21

Son funcións do secretario de departamento:

a) Redacta-la acta das sesións dos órganos colexiados do departamento.

b) Expedi-las certificacións que lle sexan requiridas.

c) Coidar do arquivo e da documentación do departamento.

d) Calquera outra que lle encomende ou delegue o director de departamento ou que se estableza no Regulamento de Réxime Interno.

Artigo 22

1. O director de departamento serao por un período de tempo de tres anos con posibilidade dunha soa reelección. Tras dous mandatos consecutivos deberán transcorrer tres anos para que poida volver a presentarse para o mesmo cargo.

2. O secretario de departamento e, de se-lo caso, o subdirector, serán nomeados polo Rector por proposta do director do

departamento, de entre calquera dos membros do Consello de Departamento.

3. O secretario do departamento e, de se-lo caso, o subdirector, cesarán por decisión do Rector, por proposta do director do departamento, cando cese o director do departamento que os propuxo ou por pedimento propio.

DISPOSICIÓN TRANSITORIAS

Primeira

a) Para efectos do cómputo previsto no artigo 3 deste Regulamento, o número mínimo de catedráticos e profesores titulares con dedicación a tempo completo será de 12. Excepcionalmente, e ata o 31 de decembre de 1997, poderán constituírse departamentos cun número non inferior a 9, para aqueles casos xustificados, nos que tralo informe favorable da Xunta de Goberno sexa aprobado polo Claustro de acordo coa Disposición Transitoria Segunda

b) Na constitución dos departamentos consideraranse computables tanto as prazas ocupadas interinamente como as de nova creación vacantes que se atopen en concurso.

Segunda

Para a constitución dos departamentos ós que se alude na disposición anterior e para a culminación do proceso, abrirase un prazo de dous meses dende a aprobación do Regulamento, para que con base nas propostas elaboradas polas áreas de coñecemento ou polos grupos de profesores que as integran, se fagan las oportunas pedimentos ó Vicerrectorado de Ordenación Universitaria, de acordo co pre-

visto no capítulo II do presente Regulamento, e no marco dos Estatutos da Universidade de Vigo, do Real Decreto 2360/1984 sobre Departamentos Universitarios e de la Lei Orgánica 11/1983 de Reforma Universitaria. Nos pedimentos efectuados por unha área de coñecemento, deberanse facer consta-las propostas alternativas ou votos particulares presentadas, se as houbese, presentadas por grupos de profesores da área de coñecemento.

A Xunta de Goberno, en función das documentacións presentadas e oída a Comisión de Ordenación Académica e Validacións, elevará ó Claustro unha proposta, para o seu debate e aprobación, da estrutura departamental da Universidade de Vigo, a cal terá todos os efectos a partir do día seguinte ó da súa aprobación.

Terceira

Transcorrido o período fixado na Disposición Transitoria Primera, a Xunta de Goberno e oídas a Comisión de Ordenación Académica e Validacións as áreas de coñecemento afectadas, elevará ó Claustro unha proposta de reagrupamento das áreas de coñecemento, integradas naqueles Departamentos que non superasen o número mínimo aludido no apartado 2 do artigo 3 deste Reglamento, en:

1. Departamentos constituídos, de acordo co establecido nos artigos 3 e 8 do presente Regulamento.
2. Novos Departamentos, de acordo co establecido nos artigos 2, 3, e 8 do presente Regulamento.

DISPOSICIÓN FINAL

Unha vez aprobado polo Claustro o presente Regulamento, procederase de modo inmediato á constitución dos departamentos, de acordo co articulado, e á elección dos directores, así como á elección no Claustro dos seus representantes na Xunta de Goberno.